

四庫全書

史部

欽定四庫全書

通鑑紀事本末卷八上

宋 袁樞 撰

宦官亡漢

黨錮之禍

董卓之亂

漢和帝永元四年竇憲兄弟專權帝以朝臣上下莫不
附憲獨中常侍鈞盾令鄭眾不事豪黨遂與定議誅憲

事見竇氏專恣

鄭眾遷大長秋帝策勲班賞眾每辭多受少帝

由是賢之常與之議論政事宦官用權自此始矣

十四年 初封大長秋鄭衆為鄴鄉侯

安帝永初元年秋九月庚午太尉徐防以災異寇賊策免
辛未司空尹勤以水雨漂流策免仲長統昌言曰光武
皇帝愠數世之失權忿彊臣之竊命矯枉過直政不任
下雖置三公事歸臺閣自此以來三公之職備員而已
然政有不治猶加譴責而權移外戚之家寵被近習之
豎親其黨類用其私人內充京師外布列郡顛倒賢愚
貿易選舉疲駑守境貪殘牧民撓擾百姓忿怒四夷招

致乖叛亂離斯瘼怨氣並作陰陽失和三光虧缺乖異
數至蟲螟食稼水旱為災此時戚宦之臣所致然也反
以策讓三公至於死免乃足為叫呼蒼天號咷泣血者
矣昔文帝之於鄧通可謂至愛而猶展申屠嘉之志夫
見仕如此則何患於左右小臣哉至如近世外戚宦豎
請託不行意氣不滿立能陷人於不測之禍惡可得彈
正者哉 大長秋鄭衆中常侍蔡倫等皆秉勢豫政周
章數進直言太后不能用

建光元年帝以江京嘗迎帝於邸封為都鄉侯李閏為
雍鄉侯閏京與中常侍樊豐黃門令劉安鈞盾令陳達
等扇動內外競為侈虐司徒楊震上疏不省

延光二年中常侍樊豐等更相扇動傾搖朝廷楊震上
疏不聽

三年樊豐等見楊震連諫不從無所顧忌震復上疏豐
等惶怖遂共譖震收震太尉印綬遣歸本郡震飲酖而
卒秋八月江京樊豐等廢太子保為濟陰王

四年北鄉侯即位有司奏樊豐等互作威福皆下獄死

冬十月中常侍孫程等迎濟陰王即皇帝位

五事並見
倭倖廢立

順帝陽嘉二年夏六月丁丑洛陽宣德亭地拆長八十

五丈帝引公卿所舉敦樸之士使之對策及特問以當

世之敝為政所宜李固對曰詔書所以禁侍中尚書中

臣子弟不得為吏察孝廉者以其秉威權容請託故也

而中常侍在日月之側聲勢振天下子弟祿任曾無限

極雖外託謙默不干州郡而諂偽之徒望風進舉今可

為設常禁同之中臣昔館陶公主為子求郎明帝不許
賜錢千萬所以輕厚賜重薄位者為官人失才害及百
姓也竊聞長水司馬武宣開陽城門候羊廸等無它功
德初拜便真此雖小失而漸壞舊章先聖法度所宜堅
守故政教一跌百年不復詩云上帝板板下民卒瘁刺
周王變祖法度故使下民將盡病也今陛下之有尚書
猶天之有北斗也斗為天喉舌尚書亦為陛下喉舌斗
斟酌元氣運乎四時尚書出納王命賦政四海權尊勢

重責之所歸若不平心灾青必至誠宜審擇其人以毗
聖政今與陛下共天下者外則公卿尚書內則常侍黃
門辟猶一門之內一家之事安則共其福慶危則通其
禍敗刺史二千石外統職事內受法則夫表曲者景必
邪源清者流必潔猶叩樹本百枝皆動也由此言之本
朝號令豈可蹉跌天下之紀綱當今之急務也夫人君
之有政猶水之有隄防隄防完全雖遭雨水霖潦不能
為變政教一立暫遭凶年不足為憂誠令隄防穿漏萬

夫同力不能復救政教一壞賢智馳騫不能復還今隄防雖堅漸有孔穴譬之一人之身本朝者心腹也州郡者四支也心腹痛則四支不舉故臣之所憂在心腹之疾非四支之患也苟堅隄防務政教先安心腹整理本朝雖有寇賊水旱之變不足介意也誠令隄防壞漏心腹有疾雖無水旱之灾天下固可以憂矣又宜罷退宦官去其權重裁置常侍二人方直有德者省事左右小黃門五人才智閒雅者給事殿中如此則論者厭塞升平

可致也上覽衆對以李固為第一諸常侍叩頭謝罪朝廷肅然以固為議郎宦者疾之詐為飛章以陷其罪事從中下大司農南郡黃尚等請之於梁商僕射黃瓊復救明其事久乃得釋出為洛令固棄官歸漢中

四年春二月初聽中官得以養子襲爵初帝之復位宦官之力也由是有寵參與政事御史張綱上書曰竊尋文明二帝德化尤盛中官常侍不過兩人近倖賞賜裁滿數金惜費重民故家給人足而頃者以來無功小人

皆有官爵非愛民重器承天順道者也書奏不省

永和元年十二月以前司空王龔為太尉龔疾官官專
權上書極言其狀諸黃門使客誣奏龔罪上命龔亟自
實李固奏記於梁商曰王公以堅貞之操橫為讒佞所
誣衆人聞知莫不歎慄夫三公尊重無詰理訴寃之義
纖微感繫輒引分決是以舊典不有大罪不至重問王
公卒有它變則朝廷獲害賢之名羣臣無救護之節矣
語曰善人在患饑不及餐斯其時也商即言之於帝事

乃得釋

二年冬十月丁卯京師地震太尉王龔以中常侍張昉等專弄國權欲奏誅之宗親有以楊震行事諫之者龔乃止

三年梁商以曹節等用事遣子冀不疑與交友

桓帝建和元年秋七月詔封中常侍劉廣等皆為列侯杜喬諫之書奏不省 宦者唐衡左悺等共譖杜喬與李固以帝不堪奉漢祀帝怨之後梁冀誣李固杜喬與

妖賊劉文等交通皆收繫死獄中

三事並見
梁氏之變

永興元年秋七月郡國三十二蝗河水溢百姓饑窮流
亡者數十萬戶冀州尤甚詔以侍御史朱穆為冀州刺
史冀部令長間穆濟河解印綬去者四十餘人及到奏
劾諸郡貪污者有至自殺或死獄中宦者趙忠喪父歸
葬安平僭為王臣穆下郡案驗吏畏其嚴遂發墓剖棺
陳尸出之帝聞大怒徵穆詣廷尉輸作左校大學書生
潁川劉陶等數千人詣闕上書訟穆曰伏見弛刑徒朱

穆處公憂國拜州之日志清姦惡誠以常侍貴寵父兄
子弟布在州郡競為虎狼噬食小民故穆張理天網補
綴漏目羅取殘禍以塞天意由是內官咸共恚疾謗譖
煩興讒隙仍作極其刑譴輸作左校天下有識皆以穆
同勤禹稷而被共鯨之戾若死者有知則唐帝怒於崇
山重華忿於蒼墓矣當今中官近習竊持國柄手握王
爵口含天憲運賞則使餓隸富於季孫呼喻則令伊顏
化為桀跖而穆獨亢然不顧身害非惡榮而好辱惡生

而好死也徒感王綱之不攝懼天綱之久失故竭心懷
憂為上深計臣願黥首擊趾代穆校作帝覽其奏乃赦
之

永壽元年春二月司隸冀州饑人相食太學生劉陶上
疏陳事曰夫天之與帝帝之與民猶頭之與足相須而
行也陛下目不視鳴條之事耳不聞檀車之聲天灾不
有痛於肌膚震食不即損於聖體故蔑三光之謬輕上
天之怒伏念高祖之起始自布衣合散扶傷克成帝業

勤亦至矣流福遺祚至於陛下陛下既不能增明烈考之軌而忽高祖之勤妄假利器委授國柄使羣醜刑隸芟刈小民虎豹窟於麀場豺狼乳於春囿貨殖者為窮寃之魂貧餒者作饑寒之鬼死者悲於寃室生者戚於朝野是愚臣所為咨嗟長懷歎息者也且秦之將亡正諫者誅諛進者賞嘉言結於忠舌國命出於讒口擅閭樂於咸陽授趙高以車府權去已而不知威離身而不顧古今一揆成敗同勢願陛下遠覽彊秦之傾近察哀

平之變得失昭然禍福可見臣又聞危非仁不扶亂非智不救竊見故冀州刺史南陽朱穆前烏桓校尉臣同郡李膺皆履正清平貞高絕俗斯實中興之良佐國家之柱臣也宜還本朝夾輔王室臣敢吐不時之義於諱言之朝猶冰霜見日必至消滅臣始悲天下之可悲今天下亦悲臣之愚惑也書奏不省

延熹二年秋七月帝召小黄門史唐衡中常侍單超小黄門史左悺中常侍徐璜小黄門令具瑗等五人共定議

誅梁冀

事見梁氏之變

八月詔賞誅梁冀之功封單超徐璜

具瑗左官唐衡皆為縣侯超食二萬戶璜等各萬餘戶

世謂之五侯仍以愴衡為中常侍又封尚書令尹勲等

七人皆為亭侯帝既誅梁冀故舊恩私多受封爵追贈

皇后父鄧香為車騎將軍封安陽侯更封后母宣為昆

陽君兄子康秉皆為列侯宗族皆列校郎將賞賜以巨

萬計中常侍侯覽上嫌五千匹帝賜爵關內侯又託以

與議誅冀進封高鄉侯又封小黃門劉普趙忠等八人

為鄉侯自是權勢專歸宦官矣五侯尤貪縱傾動內外
時灾異數見白馬令甘陵李雲露布上書移副三府曰
梁冀雖恃權專擅虐流天下今以罪行誅猶召家臣搤
殺之耳而猥封謀臣萬戶以上高祖聞之得無見非西
北列將得無解體孔子曰帝者諦也今官位錯亂小人
謫進財貨公行政化日損又一拜用不經御省是帝欲
不諦乎帝得奏震恐下有司逮雲詔尚書都護劒戟送
黃門北寺獄使中常侍管霸與御史廷尉雜考之時弘

農五官掾杜衆傷雲以忠諫獲罪上書願與雲同日死
帝愈怒遂并下廷尉大鴻臚陳蕃上疏曰李雲所言雖
不識禁忌干上逆旨其意歸於忠國而已昔高祖忍周
昌不諱之諫成帝赦朱雲腰領之誅今日殺雲臣恐剖
心之譏復議於世矣太常楊秉雒陽市長沐茂郎中上
官資並上疏請雲帝恚甚有司奏以為大不敬詔切責
蕃秉免歸田里茂資貶秩二等時帝在濯龍池管霸奏
雲等事霸跪言曰李雲野澤愚儒杜衆郡中小吏出於

狂戇不足加罪常謂霸曰帝欲不諦是何等語而常侍
欲原之邪顧使小黃門可其奏雲衆皆死獄中於是嬖
寵益橫太尉瓊自度力不能制乃稱疾不起上疏曰陛
下即位以來未有勝政諸梁秉權豎官充朝李固杜喬
既以忠言橫見殘滅而李雲杜衆復以直道繼踵受誅
海內傷懼益以怨結朝野之人以忠為譁尚書周永素
事梁冀假其威勢見冀將衰乃陽毀示忠遂因姦計亦
取封侯又黃門挾邪羣輩相黨自冀興盛腹背相親朝

夕圖謀共構姦軌臨冀黨誅無可設巧復記其惡以
要爵賞陛下不加清微審別真偽復與忠臣並時顯封
使朱紫共色粉墨雜揉所謂抵金玉於沙礫碎珪璧於
泥塗四方聞之莫不憤歎臣世荷國恩身輕位重敢以
垂絕之日陳不諱之言書奏不納冬十月中常侍單超
疾病壬寅以超為車騎將軍是時封賞踰制內寵猥
盛陳蕃上疏曰夫諸侯上象四七藩屏上國高祖之約
非功臣不侯而聞追錄河南尹鄧萬世父遵之微功更

爵尚書令黃雋先人之絕封近習以非義授邑左右以無功傳賞至乃一門之內侯者數人故緯象失度陰陽謬序臣知封事已行言之無及誠欲陛下從是而止又采女數千食肉衣綺脂油粉黛不可貲計鄙諺言盜不過五女門以女貧家也今後宮之女豈不貧國乎帝頗采其言為出官女五百餘人但賜雋爵關內侯而封萬世南鄉侯帝從容問侍中陳留爰延朕何如主也對曰陛下為漢中主帝曰何以言之對曰尚書令陳蕃任事

則治中常侍黃門與政則亂是以知陛下可與為善可與為非帝曰昔朱雲廷折欄檻今侍中而稱朕違敬聞闕矣拜五官中郎將

三年春正月丙午新豐侯單超卒賜東園祕器棺中玉具及葵發五營騎士將作大匠起冢塋其後四侯轉橫天下為之語曰左回天具獨坐徐卧虎唐雨墮皆競起第宅以華侈相尚其僕從皆乘牛車而從列騎兄弟姻戚宰州臨郡辜較百姓與盜無異虐徧天下民不堪命

故多為盜賊焉中常侍侯覽小黃門段珪皆有田業近
濟北界僕從賓客劫掠行旅濟北相滕延一切收捕殺
數十人陳尸路衢覽珪以事訴帝延坐徵詣廷尉免左
官兄勝為河東太守皮氏長京兆趙岐恥之即日棄官
西歸唐衡兄珪為京兆尹素與岐有隙收岐家屬宗親
陷以重灋盡殺之岐逃難四方靡所不歷自匿姓名賣
餅北海市中安丘孫嵩見而異之載與俱歸藏於複壁
中及諸唐死遇赦乃敢出

六年十二月以衛尉周景為司空景榮之孫也時宦官
方熾景與太尉楊秉上言內外吏職多非其人舊典中
臣子弟不得居位秉執而今枝葉賓客布列職署或年
少庸人典據守宰上下忿患四方愁毒可遵用舊章退
貪殘塞災謗請下司隸校尉中二千石城門五營校尉
北軍中候各實覈所部應當斥罷自以狀言三府兼察
有遺漏續上帝從之於是秉條奏牧守青州刺史羊亮
等五十餘人或死或免天下莫不肅然 尚書朱穆疾

宦官恣橫上疏曰按漢故事中常侍參選士人建武以後乃悉用宦者自延平以來浸益貴盛假貂璫之飾處常伯之任天朝政事一更其手權傾海內寵貴無極子弟親戚並荷榮任放濫驕溢莫能禁禦窮破天下空竭小民愚臣以為可悉罷省遵復往初更選海內清淳之士明達國體者以補其處即兆庶黎萌蒙被聖化矣帝不納後穆因進見復口陳曰臣聞漢家舊典置侍中中常侍各一人省尚書事黃門侍郎一人傳發書奏皆用

姓族自和熹太后以女主稱制不接公卿乃以閹人為
常侍小黃門通命兩宮自此以來權傾人主窮困天下
宜皆罷遣博選者儒宿德與參政事帝怒不應穆伏不
肯起左右傳出良久乃趨而去自此中官數因事稱詔
詆毀之穆素剛不得意居無幾憤懣發疽卒

七年十二月中常侍汝陽侯唐衡武原侯徐璜皆卒

八年春中常侍侯覽兄參為益州刺史殘暴貪婪累減
億計太尉楊秉奏檻車徵參參於道自殺聞其車重三

百餘兩皆金銀錦帛東因奏曰臣案舊典宦官本在給使省闈司昏守夜而今猥受過寵執政操權附會者因公褒舉違忤者求事中傷居法王公富擬國家飲食極有膳僕妾盈紈素中常侍侯覽弟參貪殘元惡自取禍滅覽頗知釁重必有自疑之意臣愚以為不宜復見親近昔懿公刑邴鄆之父奪閭職之妻而使二人參乘卒有竹中之難覽宜急屏斥投畀有虎若斯之人非恩所宥請免官送歸本郡書奏尚書召對東掾屬詰之曰設

官分職各有司存三公統外御史察內今越秦近官經
典漢制何所依據其開公具對秉使對曰春秋傳曰除
君之惡惟力是視鄧通懈慢申屠嘉召通詰責文帝從
而請之漢世故事三公之職無所不統尚書不能詰帝
不得已竟免覽官司隸校尉韓續因奏左官罪惡及其
兄太僕南鄉侯稱請託州郡聚斂為姦賓客放縱侵犯
吏民官稱皆自殺續又奏中常侍具瑗兄沛相恭臧罪
徵詣廷尉瑗詣獄謝上還東武侯叩綬詔貶為都鄉侯

超及璜衡襲封者並降為鄉侯子弟分封者悉奪爵王
劉普等貶為關內侯尹勲等亦皆奪爵 三月宛陵大

姓羊元羣罷北海郡臧汙狼藉郡舍溷軒有奇巧亦載
之以歸河南尹李膺表按其罪元羣行賂宦官膺竟反
坐單超弟遷為山陽太守以罪繫獄廷尉馮緄考致其
死中官相黨共飛章誣緄以罪中常侍蘇康管霸固天
下良田美業州郡不敢詰大司農劉祐移書所在依科
品没入之帝大怒與膺緄俱輸作左校 夏五月丙戌

太尉楊秉薨秉為人清白寡欲嘗稱我有三不惑酒色財也秉既沒所舉賢良廣陵劉瑜乃至京師上書言中官不當比肩裂土競立爵嗣繼體傳爵又嬖女充積冗食空宮傷生費國又第舍增多窮極奇巧掘山攻石促以嚴刑州郡官府各自考事姦情賕賂皆為吏餌民愁鬱結起入賊黨官輒興兵誅討其罪貧困之民或有賣其首級以要酬賞父兄相代殘身妻孥相視分裂又陛下好微行近習之家私幸宦者之舍賓客市買熏灼道

路因此暴縱無所不容惟陛下開廣諫道博觀前古遠
佞邪之人放鄭衛之聲則政致和平德感祥風矣詔特
召瑜問災咎之徵執政者欲令瑜依違其辭乃更策以
他事瑜復悉心對八十餘言有切於前拜為議郎十
一月太尉陳蕃言李膺馮緄劉祐之枉請加原宥升之
爵任言及覆誠辭懇切以至流涕帝不聽應奉上疏曰夫
忠賢武將國之心膂竊見左校弛刑徒馮緄劉祐李膺
等誅舉邪臣肆之以瀆陛下既不聽察而猥受譴訴遂

令忠臣同愆元惡自春迄冬不蒙降恕遐邇觀聽為之
歎息夫立政之要記功忘失是以武帝捨安國於徒中
宣帝徵張敞於亡命緄前討蠻荆均吉甫之功祐數臨
督司有不吐茹之節膺著威幽并遺愛度遼今三垂蠢
動王旅未振乞原膺等以備不虞書奏乃悉免其刑久
之李膺復拜司隸校尉時小黃門張讓弟朔為野王令
貪殘無道畏膺威嚴逃還京師匿於兄家合柱中膺知
其狀率吏卒破柱取朔付雒陽獄受辭畢即殺之讓訴

欽定四庫全書

通鑑紀事本末
卷八十五

三

寬於帝帝召膺詰以不先請便加誅之意對曰昔仲尼
為魯司寇七日而誅少正卯今臣到官已積一旬私懼
以稽留為愆不意獲速疾之罪誠自知讐責死不旋踵
特乞留五日剋殄元惡退就鼎鑊始生之願也帝無復
言顧謂讓曰此汝弟之罪司隸何愆乃遣出自此諸黃
門常侍皆鞠躬屏氣休沐不敢出宮省帝怪問其故並
叩頭泣曰畏李校尉時朝廷日亂綱紀頽弛而膺獨持
風裁以聲名自高士有被其容接者名為登龍門云

九年 初帝為蠡吾侯受學於甘陵周福及即位擢福為尚書時同郡河南尹房植有名當朝鄉人為之謠曰天下規矩房伯武因師獲印周仲進二家賓客互相譏揣遂各樹朋徒漸成尤隙由是甘陵有南北部黨人之議自此始矣汝南太守宗資以范滂為功曹南陽太守成瑨以岑暉為功曹皆委心聽任使之褒善糾違肅清朝府滂尤剛勁疾惡如讎滂甥李頌素無行中常侍唐衡以屬資資用為吏滂寢而不召資遷怒捶書佐朱零

零仰曰范滂清裁今日寧受笞而死滂不可違資乃止
郡中中人以下莫不怨之於是二郡為謠曰汝南太守
范孟博南陽宗資主畫諾南陽太守岑公孝弘農成瑨
但坐嘯太學諸生三萬餘人郭泰及潁川賈彪為其冠
與李膺陳蕃王暢更相褒重學中語曰天下模楷李元
禮不畏強禦陳仲舉天下俊秀王叔茂於是中外承風
競以臧否相尚自公卿以下莫不畏其貶議屣履到門
宛有富賈張汎者與後宮有親又善雕鏤玩好之物頗

以賂遺中官以此得顯位用執縱橫岑晳與賊曹史張
牧勸成璿收捕汎等既而遇赦璿竟誅之并收其宗族
賓客殺二百餘人後乃奏聞小黃門晉陽趙津貪橫放恣
為一縣巨患太原太守平原劉瓚使郡吏王允討捕亦
於赦後殺之於是中常侍侯覽使張汎妻上書訟冤宦
官因緣譖訴璿瓚帝大怒徵璿瓚皆下獄有司承旨奏
璿瓚罪當棄市山陽太守翟超以郡人張儉為東都督
郵侯覽家在防東殘暴百姓覽喪母還家大起塋冢儉

舉奏覽罪而覽伺候遮截章竟不上儉遂破覽冢宅籍沒資財具奏其狀復不得御徐璜兄子宣為下邳令暴虐尤甚嘗求故汝南太守李嵩女不能得遂將吏卒至嵩家載其女歸戲射殺之東海相汝南黃浮聞之收宣家屬無少長悉考之掾史以下固爭之浮曰徐宣國賊今日殺之明日坐死足以瞑目矣即案宣罪棄市暴其尸於是宦官訴冤於帝帝大怒超浮並坐髡鉗輸作石校太尉陳蕃司空劉茂共諫請璜瓚超浮等罪帝不悅有

司劾奏之茂不敢復言蕃乃獨上疏曰今寇賊在外四
支之疾內政不理心腹之患臣寢不能寐食不能飽實
憂左右日親忠言日疎內患漸積外難方深陛下超從
列侯繼承天位小家畜產百萬之資子孫尚恥愧失其
先業況乃產兼天下受之先帝而欲懈怠以自輕忽乎
誠不愛己不當念先帝得之勤苦耶前梁氏五侯毒徧
海內天啓聖意收而戮之天下之議冀當小平明鑒未
遠覆車如昨而近習之權復相扇結小黃門趙津大猾

張汎等肆行貪虐姦媚左右前太原太守劉瓚南陽太守成瑨糾而戮之雖言赦後不當誅殺原其誠心在乎去惡至於陛下有何悄悄而小人道長熒惑聖聽遂使天威為之發怒必加刑譴已為過甚況乃重罰令伏歐刀乎又前山陽太守翟超東海相黃浮奉公不撓疾惡如讎超沒侯覽財物浮誅徐宣之罪並蒙刑坐不逢赦怨覽之從橫沒財已幸宣犯釁過死有餘辜昔丞相申屠嘉召責鄧通雒陽令董宣折辱公主而文帝從而請

之光武加以重賞未聞二臣有專命之誅而今左右羣
豎惡傷黨類妄相交構致此刑譴聞臣是言當復
號訴陛下深宜割塞近習與政之源引納尚書朝省之
士簡練清高斥黜佞邪如是天和於上地洽於下休徵
符瑞豈遠乎哉帝不納宦官由此疾蕃彌甚選舉奏議
輒以中詔譴卻長史已下多至抵罪猶以蕃名臣不敢
加害平原襄楷詣闕上疏曰臣聞皇天不言以文象設
教臣竊見太微天廷五帝之坐而金火罰星揚光其中

於占天子凶又俱入房心法無繼嗣前年冬大寒殺鳥
獸魚鼈城傍竹栢之葉有傷枯者臣聞於師曰栢傷竹
枯不出三年天子當之今自春夏以來連有霜雹及大
雨雷電臣作威作福刑罰急刻之所感也太原太守劉
瓚南陽太守成瑨志除姦邪其所誅剪皆合人望而陛
下受閹豎之譖乃遠加考逮三公上書乞哀瓚等不見採
察而嚴被譴讓憂國之任將遂杜口矣臣聞殺無罪誅
賢者禍及三世自陛下即位以來頻行誅罰梁冠孫鄧

並見族滅其從坐者又非其數李雲上書明主所不當
諱杜衆乞死諒以感悟聖朝曾無赦宥而并被殘戮天
下之人咸知其冤漢興以來未有拒諫誅賢用刑太深
如今者也昔文王一妻誕至十子今宮女數千未聞慶
育宜修德省刑以廣螽斯之祚案春秋以來及古帝王
未有河清臣以為河者諸侯位也清者屬陽濁者屬陰
河當濁而反清者陰欲為陽諸侯欲為帝也京房易傳
曰河水清天下平今天垂異地吐妖人癘疫三者並時

而有河清猶春秋麟不當見而見孔子書之以為異也
願賜清閒極盡所言書奏不省十餘日復上書曰臣聞
殷紂好色妲己是出葉公好龍真龍游廷今黃門常侍
天刑之人陛下愛待兼倍常寵係嗣未兆豈不為此書
上即召入詔尚書問狀楷言古者本無宦官武帝末數
游後宮始置之耳尚書承旨奏楷不正辭理而違背經
藝借假星宿造合私意誣上罔事請下司隸正楷罪法
收送雒陽獄帝以楷言雖激切然皆天文恒象之數故

不誅猶司寇論刑符節令汝南蔡衍議郎劉瑜表救成瑨劉瓚言甚切厲亦坐免官瑨瓚竟死獄中瑨瓚素剛直有經術知名當時故天下惜之岑晊張牧逃竄獲免晊之亡也親友競匿之賈彪獨閉門不納時人望之彪曰傳言相時而動無累後人公孝以要君致釁自遺其咎吾已不能奮戈相待反可容隱之乎於是咸服其裁正 河南張成善風角推占當赦教子殺人司隸李膺督促收捕既而逢宥獲免膺愈懷憤疾竟案殺之成素

以方伎交通宦官帝亦頗訊其占宦官教成弟子牢修
上書告膺等養太學遊士交結諸郡生徒更相驅馳共
為部黨誹訕朝廷疑亂風俗於是天子震怒班下郡國
逮捕黨人布告天下使同忿疾案經三府太尉陳蕃卻
之曰今所案者皆海內人譽憂國忠公之臣此等猶將
十世宥也豈有罪名不章而致收掠者乎不肯平署帝
愈怒遂下膺等於黃門北寺獄其辭所連及太僕潁川
杜密御史中丞陳翔及陳寔范滂之徒二百餘人或逃

遁不獲皆懸金購募使者四出相望陳寔曰吾不就獄
衆無所恃乃自往請囚范滂至獄吏謂曰凡坐繫者皆
祭臯陶滂曰臯陶古之直臣知滂無罪將理之於帝如
其有罪祭之何益衆人由此亦止陳蕃復上書極諫帝
諱其言切託以蕃辟召非其人策免之時黨人獄所染
逮者皆天下名賢度遼將軍皇甫規自以西州豪傑恥
不得與乃自上言臣前薦故大司農張奐是附黨也又
臣昔論輸左校時太學生張鳳等上書訟臣是為

黨人所附也臣宜坐之朝廷知而不問

張鳳等上書
事見諸羌叛

下服

永康元年五月陳蕃既免朝臣震栗莫敢復為黨人言者賈彪曰吾不西行大禍不解乃入雒陽說城門校尉竇武尚書魏郡霍諝等使訟之武上疏曰陛下即位以來未聞善政常侍黃門競行譎詐妄爵非人伏尋西京佞臣執政終喪天下今不慮前事之失復循覆轍之軌臣恐二世之難必將復及趙高之變不朝則夕近者姦

臣等修造設黨議遂收前司隸校尉李膺等逮考逮及
數百人曠年拘錄事無效驗臣惟膺等建忠抗節志經
王室此誠陛下稷卨伊呂之佐而虛為姦臣賊子之所
誣枉天下寒心海內失望惟陛下留神澄省時見理出
以厭人鬼喁喁之心今臺閣近臣尚書朱寓荀緄劉祐
魏朗劉矩尹勲等皆國之真士朝之良佐尚書郎張陵
矯皓苑康楊喬邊韶戴恢等文質彬彬明達國典內外
之職羣才並列而陛下委任近習專樹饗饗外典州

郡內幹心瞽宜以次貶黜案罪糾罰信任忠良平決臧否使邪正毀譽各得其所寶愛天官唯善是授如此咎徵可消天應可待間者有嘉禾芝草黃龍之見夫瑞生必於嘉士福至實由善人在德為瑞無德為災陛下所行不合天意不宜稱慶書奏因以病上還城門校尉槐里侯印綬霍諝亦為表請帝意稍解使中常侍王甫就獄訊黨人范滂等皆三木囊頭暴於階下甫以次辨詰曰卿等更相拔舉迭為脣齒其意如何滂曰仲尼之言

見善如不及見惡如探湯滂欲使善善同其清惡惡同其汙謂王政之所願聞不悟更以為黨古之修善自求多福今之修善身陷大戮身死之日願埋滂於首陽山側上不負皇天下不愧夷齊甫慙然為之改容乃得並解桎梏李膺等多引宦官子弟宦官懼請帝以天時宜赦六月庚申赦天下改元黨人二百餘人皆歸田里書名三府禁錮終身范滂往候霍諝而不謝或讓之滂曰昔叔向不見祁奚吾何謝焉滂南歸汝南南陽士大夫

迎之者車數千兩鄉人殷陶黃穆侍衛於旁應對賓客
滂謂陶等曰今子相隨是重吾禍也遂遁還鄉里初詔
書下舉鉤黨郡國所奏相連者多至百數唯平原相史
弼獨無所上詔書前後迫切州郡髡笞掾史從事坐傳
舍責曰詔書疾惡黨人旨意懇惻青州六郡其五有黨
平原何治而得獨無弼曰先王疆理天下畫界分境水
土異齊風俗不同它郡自有平原自無胡可相比若承
望上司誣陷良善淫刑濫罰以逞非理則平原之人戶

可為黨相有死而已所不能也從事大怒即收郡僚職
送獄遂舉奏弼會黨禁中解弼以俸贖罪所脫者甚衆
竇武所薦朱寓沛人苑康勃海人楊喬會稽人邊韶陳
留人喬容儀偉麗數上言政事帝愛其才貌欲妻以公
主喬固辭不聽遂閉口不食七日而死 十二月丁丑
帝崩于德陽前殿城門校尉竇武議立嗣召侍御史河
間劉儵問以國中宗室之賢者儵稱解讀亭侯宏宏者
河間孝王之曾孫也祖淑父萇世封解讀亭侯武乃入

白太后定策禁中以儵守光祿大夫與中常侍曹節並持節將中黃門虎賁羽林千人奉迎宏時年十二

靈帝建寧元年春正月壬午以城門校尉竇武為大將軍前太尉陳蕃為太傅與武及司徒胡廣參錄尚書事時新遭大喪國嗣未立諸尚書畏懼多託病不朝陳蕃移書責之曰古人立節事亡如存今帝祚未立政事日廢諸君奈何委荼蓼之苦息偃在牀於義安乎諸尚書惶怖皆起視事 己亥解讀亭侯至夏門亭使竇武持節以

王青蓋車迎入殿中庚子即皇帝位 六月癸巳錄定
策功封竇武為聞喜侯武子機為渭陽侯兄子紹為鄠
侯靖為西鄉侯中常侍曹節為長安鄉侯侯者凡十一
人涿郡盧植上書說武曰足下之於漢朝猶旦奭之在
周室建立聖主四海有繫論者以為吾子之功於斯為
重今同宗相後披圖案牒以次建之亦何勲之有豈可
橫叨天功以為己力乎宜辭大賞以全身名武不能用
植身長八尺二寸音聲如鐘性剛毅有大節少事馬融融

性豪侈多列女倡歌舞於前植侍講積年未嘗轉盼融
以是敬之太后以陳蕃舊德特封高陽鄉侯蕃上疏讓曰
臣聞割地之封功德是為臣雖無素潔之行竊慕君子
不以其道得之不居也若夫受爵不讓掩面就之使皇
天振怒災流下民於臣之身亦何所寄太后不許蕃固
讓章前後十上竟不受封 初竇太后之立也陳蕃有
力焉及臨朝政無大小皆委於蕃蕃與竇武同心戮心
以獎王室徵天下名賢李膺杜密尹勲劉瑜等皆列於

朝廷與共參政事於是天下之士莫不延頸想望太平而帝乳母趙婕妤及諸女尚書旦夕在太后側中常侍曹節王甫等共相朋結諂事太后太后信之數出詔命有所封拜蕃武疾之嘗共會朝堂蕃私謂武曰曹節王甫等自先帝時操弄國權濁亂海內今不誅之後必難圖武深然之蕃大喜以手推席而起武於是引同志尚書令尹勲等共定計策會有日食之變蕃謂武曰昔蕭望之困一石顯况今石顯數十輩乎蕃以八十之年欲為

將軍除害今可因日食斥罷宦官以塞天變武乃白太后曰故事黃門常侍但當給事省內門戶主近署財物斥今乃使與政事任重權子弟布列專為貪暴天下匈匈正以此故宜悉誅廢以清朝廷太后曰漢元以來故事世有宦官但當誅其有罪者豈可盡廢邪時中常侍管霸頗有才略專制省內武先白收霸及中常侍蘇康等皆坐死武復數白誅曹節等太后猶豫未忍故事久不發蕃上疏曰今京師囂囂道路誼譁言侯覽曹節公乘

昕王甫鄭颯等與趙夫人諸尚書並亂天下附從者升
進忤逆者中傷一朝羣臣如河中木耳汎汎東西耽祿
畏害陛下今不急誅此曹必生變亂傾危社稷其禍難
量願出臣章宣示左右并令天下諸姦知臣疾之太后
不納是月太白犯房之上將入太微侍中劉瑜素善天
官惡之上書皇太后曰案占書宮門當閉將相不利姦
人在主傍願急防之又與武蕃書以星辰錯繆不利大
臣宜速斷大計於是武蕃以朱寓為司隸校尉劉祐為

河南尹虞祁為雒陽令武奏免黃門令魏彪以所親小黃門山冰代之使冰奏收長樂尚書鄭颯送北寺獄著謂武曰此曹子便當收殺何復考為武不從令冰與尹勲侍御史祝璿雜考颯辭連及曹節王甫勲冰即奏收節等使劉瑜內奏九月辛亥武出宿歸府典中書者先以告長樂五官史朱瑀瑀盜發武奏罵曰中官放縱者自可誅耳我曹何罪而當盡見族滅因大呼曰陳蕃竇武奏白太后廢帝為大逆乃夜召素所親壯健者長樂從

官史共普張亮等十七人啼血共盟謀誅武等曹節白
帝曰外間切切請出御德陽前殿令帝拔劍踊躍使乳
母趙嬈等擁衛左右取蔡信閉諸禁門召尚書官屬脅
以白刃使作詔板拜王甫為黃門令持節至北寺獄收
尹勲山冰冰疑不受詔甫格殺之并殺勲出鄭颯還兵
劫太后奪璽綬令中謁者守南宮閉門絕複道使鄭颯
等持節及侍御史謁者捕收武等武不受詔馳入步兵
營與其兄子步兵校尉紹共射殺使者召會北軍五校

士數千人屯都亭下令軍士曰黃門常侍反盡力者封侯重賞陳蕃聞難將官屬諸生八十餘人並拔刀突入承明門到尚書門攘臂呼曰大將軍忠以衛國黃門反逆何云竇氏不道邪王甫時出與蕃相遇適聞其言而讓蕃曰先帝新棄天下山陵未成武有何功兄弟父子並封三侯又設樂飲讌多取掖庭宮人旬日之間貲財巨萬大臣若此為是道邪公為宰輔苟相阿黨復何求賊使劍士收蕃蕃拔劍叱甫辭色逾厲遂執蕃送北寺

獄黃門從官駟蹕蹕蕃曰死老魅復能損我曹員數奪
我曹稟假不即日殺之時護匈奴中郎將張奐徵還京
師曹節等以奐新至不知本謀矯制以少府周靖行車
騎將軍加節與奐率五營士討武夜漏盡王甫將虎賁
羽林等合千餘人出屯朱雀掖門與奐等合已而悉軍
闕下與武對陳甫兵漸盛使其士大呼武軍曰竇武反
汝皆禁兵當宿衛官省何故隨反者乎先降有賞營府
素畏服中官於是武軍稍稍歸甫自旦至食時兵降略

盡武紹走諸軍追圍之皆自殺梟首雒陽都亭收捕宗親賓客姻屬悉誅之及侍中劉瑜屯騎校尉馮述皆夷其族宦官又譖虎賁中郎將河間劉淑故尚書會稽魏朗云與武等通謀皆自殺遷皇太后於南宮徙武家屬於日南自公卿以下嘗為蕃武所舉者及門生故吏皆免官禁錮議郎勃海巴肅始與武等同謀曹節不知但坐禁錮後乃知而收之肅自載詣縣縣令見肅入閣解印綬欲與俱去肅曰為人臣者有謀不敢隱有罪不逃

刑既不隱其謀矣又敢逃其刑乎遂被誅曹節遷長樂衛尉封育陽侯王甫遷中常侍黃門令如故朱瑀共普張亮等六人皆為列侯十一人為關內侯於是羣小得志士大夫皆喪氣蕃友人陳留朱震收葬蕃尸匿其子逸事覺繫獄合門桎梏震受考掠誓死不言逸由是得免武府掾桂陽胡騰殞斂武尸行喪坐以禁錮武孫輔年二歲騰詐以為己子與令史南陽張敞共匿之於零陵界中亦得免張奐遷大司農以功封侯奐深病為曹

節等所賣固辭不受

二年夏四月壬辰有青蛇見於御坐上癸巳大風雨電
霹靂拔大木百餘詔公卿以下各上封事大司農張與
上疏曰昔周公葬不如禮天乃動威今竇武陳蕃忠貞
未被明宥妖青之來皆為此也宜急為改葬徙還家屬
其從坐禁錮一切蠲除又皇太后雖居南宮而恩禮不
接朝臣莫言遠近失望宜思大義顧復之報上深嘉與
言以問諸常侍左右皆惡之帝不得自從與又與尚書

劉猛等共薦王暢李膺可參三公之選曹節等彌疾其
言遂下詔切責之真等皆自囚廷尉數日乃得出並以
三月俸贖罪郎中東郡謝弼上封事曰臣聞惟虺惟蛇
女子之祥伏惟皇太后定策宮闈援立聖明書云父子
兄弟罪不相及竇氏之誅豈宜咎延太后幽隔空宮愁
感天心如有霧露之疾陛下當何面目以見天下孝和
皇帝不絕竇氏之恩前世以為美談禮為人後者為之
子今以桓帝為父豈得不以太后為母哉願陛下仰慕

有虞蒸蒸之化俯思凱風慰母之念臣又聞開國承家
小人勿用今功臣久外未蒙爵秩阿母寵私乃享大封
大風雨雹亦由於茲又故太傅陳蕃勤身王室而見陷
羣邪一旦誅滅其為酷濫駭動天下而門生故吏並離
徙錮蕃身已往人百何贖宜還其家屬解除禁網夫台
宰重器國命所繫今之四公惟司空劉寵斷斷守善餘
皆素餐致寇之人必有折足覆餗之凶可因災異並加
罷黜徵故司空王暢長樂少府李膺並居政事庶災變

可消國祚惟永左右惡其言出為廣陵府丞去官歸家
曹節從子紹為東郡太守以它罪收弼掠死於獄帝以
蛇妖問光祿勳楊賜賜上封事曰夫善不妄來災不空
發王者心有所想雖未形顏色而五星以之推移陰陽
為其變度夫皇極不建則有龍蛇之孽詩云惟虺惟蛇
女子之祥惟陛下思乾剛之道別內外之宜抑皇甫之
權割艷妻之愛則蛇變可消福祥立應賜秉之子也
初李膺等雖廢錮天下士大夫皆高尚其道而汙穢朝

廷希之者惟恐不及更共相標榜為之稱號以竇武陳蕃劉淑為三君君者言一世之所宗也李膺荀爽杜密王暢劉祐魏朗趙典朱寓為八俊俊者言人之英也郭泰范滂尹勲已肅及南陽宗慈陳留夏馥汝南蔡衍泰山羊陟為八顧顧者言能以德行引人者也張儉翟超岑暉苑康及山陽劉表汝南陳翔魯國孔昱山陽檀敷為八及及者言其能導人追宗者也度尚及東平張邈王孝東郡劉儒泰山胡毋班陳留秦周魯國蕃鄉東萊

王章為八厨厨者言能以財救人者也及陳實用事復
舉拔膺等陳實誅膺等復廢宦官疾惡膺等每下詔書
輒申黨人之禁侯覽怨張儉尤甚覽鄉人朱並素佞邪
為儉所棄承覽意指上書告儉與同鄉二十四人別相
署號共為部黨圖危社稷而儉為之魁詔刊章捕儉等
冬十月大長秋曹節因此諷有司奏諸鉤黨者故司空
虞放及李膺杜密朱寓荀翌翟超劉儒范滂等請下州
郡考治是時上年十四問節等曰何以為鉤黨對曰鉤

黨者即黨人也上曰黨人何用為惡而欲誅之邪對曰
皆相舉羣輩欲為不軌上曰不軌欲如何對曰欲圖社
稷上乃可其奏或謂李膺曰可去矣對曰事不辭難罪
不逃刑臣之節也吾年已六十死生有命去將安之乃
詣詔獄考死門生故吏並被禁錮侍御史蜀郡景毅子
顧為膺門徒未有錄牒不及於謹毅然然曰本謂膺賢
遣子師之豈可以漏脫名籍苟安而已遂自表免歸汝
南督郵吳導受詔捕范滂至征羌抱詔書閉傳舍伏牀

而泣一縣不知所為滂聞之曰必為我也即自詣獄縣令郭揖大驚出解印綬引與俱亡曰天下大矣子何為在此滂曰滂死則禍塞何敢以罪累君又令老母流離乎其母就與之訣滂白母曰仲博孝敬足以供養滂從龍舒君歸黃泉存亡各得其所惟大人割不可忍之恩勿增感戚仲博者滂弟也龍舒君者滂父龍舒侯相顯也母曰汝今得與李杜齊名死亦何恨既有令名復求壽考可兼得乎滂跪受教再拜而辭顧其子曰吾欲使

汝為惡惡不可為使汝為善則我不為惡行路聞之莫
不流涕凡黨人死者百餘人妻子皆徙邊天下豪傑及
儒學有行義者官官一切指為黨人有怨隙者因相陷
害睚眦之忿濫入黨中州郡承旨或有未嘗交關亦離
禍毒其死徙廢禁者又六七百人郭泰聞黨人之死私
為之慟曰詩云人之云亡邦國殄瘁漢室滅矣但未知
瞻烏爰止于誰之屋耳泰雖好臧否人倫而不為危言
覈論故能處濁世而怨禍不及焉張儉亡命困迫望門

投止莫不重其名行破家相容後流轉東萊止李篤家
外黃令毛欽操兵到門篤引欽就席曰張儉負罪亡命
篤豈得藏之若審在此此人名士明廷寧宜執之乎欽
因起撫篤曰蘧伯玉恥獨為君子足下如何專取仁義
篤曰今欲分之明廷載半去矣欽歎息而去篤導儉經北
戲子然家遂入漁陽出塞其所經歷伏重誅者以十數
連引收考者布徧天下宗親並皆殄滅郡縣為之殘破
儉與魯國孔褒有舊亡抵褒不遇褒弟融年十六匿之

後事泄儉得亡走國相收襄融送獄未知所坐融曰保
納舍藏者融也當坐襄曰彼來求我非弟之過吏問其
母母曰家事任長妾當其辜一門爭死郡縣疑不能決
乃上讞之詔書竟坐襄及黨禁解儉乃還鄉里後為衛
尉卒年八十四夏馥聞張儉亡命歎曰孽自己作空汙
良善一人逃死禍及萬家何以生為乃自剪鬚變形入
林慮山中隱姓名為冶家傭親爇煙炭形貌毀瘁積二
三年人無知者馥弟靜載縑泉追求餉之馥不受曰弟

柰何載禍相餉乎黨禁未解而卒初中常侍張讓父死
歸葬潁川雖一郡畢至而名士無往者讓甚恥之陳寔
獨弔焉及誅黨人讓以寔故多所全宥南陽何顒素與
陳蕃李膺善亦被收捕乃變名姓匿汝南間與袁紹為
奔走之交常私入雒陽從紹計議為諸名士罹黨事者
求救援設權計使得逃隱所全免甚衆初太尉袁湯三
子成逢隗成生紹逢生術逢隗皆有名稱少歷顯官時
中常侍袁赦以逢隗宰相家與之同姓推崇以為外援

故袁氏貴寵於世富奢甚不與它公族同紹壯健有威容愛士養名賓客輻輳歸之輜輶柴轂填接街陌術亦以俠氣聞逢從兄子閔少有操行以耕學為業逢隗數饋之無所受閔見時方險亂而家門富盛常對兄弟歎曰吾先公福祚後世不能以德守之而競為驕奢與亂世爭權此即晉之三郤矣及黨事起閔欲投迹深林以母老不宜遠遁乃築土室四周於庭不為戶自牖納飲食母思閔時往就視母去便自掩閉兄弟妻子莫得見

也潛身十八年卒於土室初范滂等非訐朝政自公卿
以下皆折節下之太學生爭慕其風以為文學將興處
士復用申屠蟠獨歎曰昔戰國之世處士橫議列國之
王至為擁篲先驅卒有坑儒燒書之禍今之謂矣乃絕
迹於梁碭之間因樹為屋自同傭人居二年滂等果罹
黨錮之禍唯蟠超然免於評論

臣光曰天下有道君子揚于王庭以正小人之罪而莫
敢不服天下無道君子囊括不言以避小人之禍而猶

或不免黨人生昏亂之世不在其位四海橫流而欲以
口舌救之臧否人物激濁揚清撿虺蛇之頭踐虎狼之
尾以至身被淫刑禍及朋友士類殲滅而國隨以亡不
亦悲乎夫唯郭泰既明且哲以保其身申屠蟠見幾而
作不俟終日卓乎其不可及已 十一月長樂太僕曹
節病困詔拜車騎將軍有頃疾瘳上印綬復為中常侍
位特進秩中二千石

四年春正月甲子帝加元服赦天下惟黨人不赦 帝

以竇太后有援立之功冬十月戊子朔率羣臣朝太后於南宮親饋上壽黃門令董萌因此數為太后訴寃帝深納之供養資奉有加於前曹節王甫疾之誣萌以謗訕永樂宮下獄死

熹平元年五月長樂太僕侯覽坐專權驕奢策收印綬自殺六月竇太后母卒於比景太后憂思感疾癸巳崩於雲臺宦者積怨竇氏以衣車載太后尸置城南市舍數日曹節王甫欲用貴人禮殯帝曰太后親立朕躬

統承大業豈宜以貴人終乎於是發喪成禮節等欲別
葬太后而以馮貴人配祔詔公卿大會朝堂令中常侍
趙忠監議太尉李咸時病扶輿而起擣椒自隨謂妻子
曰若皇太后不得配食桓帝吾不生還矣既議坐者數
百人各瞻望良久莫肯先言趙忠曰議當時定廷尉陳
球曰皇太后以盛德良家母臨天下宜配先帝是無所
疑忠笑而言曰陳廷尉宜便操筆球即下議曰皇太后
自在椒房有聰明母儀之德遭時不造援五聖明承繼

宗廟功烈至重先帝晏駕因遇大獄遷居空宮不幸早
世家雖獲罪事非太后今若別葬誠失天下之望且馮
貴人家嘗被發掘骸骨暴露與賊併尸魂靈汙染且無
功於國何宜上配至尊忠省球議作色俛仰蚩球曰陳
廷尉建此議甚健球曰陳竇既寃皇太后無故幽閉臣
常痛心天下憤歎今日言之退而受罪宿昔之願也李
咸曰臣本謂宜爾誠與意合於是公卿以下皆從球議
曹節王甫猶爭以為梁后家犯惡逆別葬懿陵武帝默

廢衛后而以李夫人配食今竇氏罪深豈得合葬先帝
李威復上疏曰臣伏惟章德竇后虐害恭懷安思閹后
家犯惡逆而和帝無異葬之議順朝無貶降之文至於
衛后孝武皇帝身所廢棄不可以為比今長樂太后尊
號在身親嘗稱制且援立聖明光隆皇祚太后以陛下
為子陛下豈得不以太后為母子無黜母臣無貶君宜
合葬宣陵一如舊制帝省奏從之秋七月甲寅葬桓思
皇后于宣陵 有人書朱雀闕言天下大亂曹節王甫

幽殺太后公卿皆尸祿無忠言者詔司隸校尉劉猛逐捕十日一會猛以誹書言直不肯急捕月餘主名不立猛坐左轉諫議大夫以御史中丞段熲代之熲乃四出逐捕及太學游生繫者千餘人節等又使熲以它事奏猛論輸左校初司隸校尉王寓依倚宦官求薦於太常張奐奐拒之寓遂陷奐以黨罪禁錮渤海王惲之貶廖陶也因中常侍王甫求復國許謝錢五十萬既而桓帝遺詔復惲國惲知非甫功不肯還謝錢中常侍鄭珣

欽定四庫全書

詞類賦事本末
卷八上

中黃門董騰數與惲交通甫密司察以告段熲冬十月
收颯送北寺獄使尚書令廉忠誣奏颯等謀迎立惲大
逆不道遂詔冀州刺史收惲考實追責惲令自殺妃妾
十一人子女七十人伎女二十四人皆死獄中傳相以
下悉伏誅甫等十二人皆以功封列侯

五年閏五月永昌太守曹鸞上書曰夫黨人者或者年
淵德或衣冠英賢皆宜股肱王室左右大猷者也而久
被禁錮辱在塗泥謀反大逆尚蒙赦宥黨人何罪獨不

開怒乎所以災異屢見水旱荐臻皆由於斯宜加沛然以副天心帝省奏大怒即詔司隸益州檻車收鷹送槐里獄掠殺之於是詔州郡更考黨人門生故吏父子兄弟在位者悉免官禁錮爰及五屬

光和元年六月丁丑有黑氣墮帝所御溫德殿東庭中長十餘丈似龍秋七月壬子青虹見玉堂後殿庭中詔召光祿大夫楊賜等詣金商門問以災異及消後之術賜對曰春秋讖曰天投蜺天下怨海內亂加四百之期

亦復垂及今妾媵閹尹之徒共專國朝欺罔日月幸賴
皇天垂象謹告周書曰天子見怪則修德諸侯見怪則
修政卿大夫見怪則修職士庶人見怪則修身唯陛下
斥遠佞巧之臣速徵鶴鳴之士斷絕尺一抑止槃游冀
上天還威衆變可弭議郎蔡邕對曰臣伏思諸異皆亡
國之怪也天於大漢殷勤不已故屢出祇變以當譴責
欲令人君感悟改危即安今蜺墮雞化皆婦人干政之
所致也前者乳母趙婕貴重天下讒諛驕溢續以永樂

門史霍玉依阻城社又為姦邪今道路紛紛復云有程
大人者察其風聲將為國患宜高為隄防明設禁令深
惟趙霍以為至戒今太尉張顥為玉所進光祿勳偉璋
有名貪濁又長水校尉趙珣屯騎校尉蓋升並叨時幸
榮富優足宜念小人在位之咎退思引身避賢之福伏
見廷尉郭禧純厚老成光祿大夫橋玄聰達方直故太
尉劉寵忠實守正並宜為謀主數見訪問夫宰相大臣
君之四體委任責成優劣已分不宜聽納小吏雕琢大

臣也又尚方工技之作鴻都篇賦之文可且消息以示
惟憂宰府孝廉士之高選近者以辟召不慎切責三公
而今並以小文超取選舉閒請託之門違明王之典衆
心不厭莫之敢言臣願陛下忍而絕之思惟萬機以答
天望聖朝既自約厲左右近臣亦宜從化人自抑損以
塞咎戒則大道虧滿鬼神福謙矣夫君臣不密上有漏
言之戒下有失身之禍願寢臣表無使盡忠之吏受怨
姦仇章奏帝覽而歎息因起更衣曹節於後竊視之悉

宣語左右事遂漏露其為邕所裁黜者側目思報初邕
與大鴻臚劉邵素不相平叔父衛尉質又與將作大匠
陽球有隙球即中常侍程璜女婿也璜遂使人飛章言
邕質數以私事請託於邵邵不聽邕含隱切志欲相中
於是詔下尚書召邕詰狀邕上書曰臣實愚戇不顧後
害陛下不念忠臣直言宜加掩蔽誹謗卒至使用疑怪
臣年四十有六孤特一身得託名忠臣死有餘榮恐陛
下於此不復聞至言矣於是下邕質於雒陽獄劾以仇

怨奉公議害大臣大不敬棄市事奏中常侍河南呂彊
愍邕無罪力為伸請帝亦更思其章有詔減死一等與家
屬髡鉗徙朔方不得以赦令除陽球使客追路刺邕客
感其議皆莫為用球又賂其部主使加毒害所賂者反
以其情戒邕由是得免 宋皇后無寵後官幸姬衆共

譖毀渤海王惺妃宋氏即后之姑也中常侍王甫恐后
怨之因譖后挾左道祝詛帝信之遂策收璽綬后自致
暴室以憂死父不其鄉侯鄧及兄弟並被誅 丙子晦

日有食之尚書盧植上言凡諸黨錮多非其罪可
加赦恕申宥回枉又宋后家屬並以無辜委骸橫尸
不得斂葬宜敕收拾以安遊魂帝不省

二年王甫曹節等姦虐弄權扇動內外太尉段熲阿附
之節甫父兄子弟為卿校牧守令長者布滿天下所在
貪暴甫養子吉為沛相尤殘酷凡殺人皆磔尸車上隨
其罪目宣示屬縣夏月腐爛則以繩連其骨周徧一郡
乃止見者駭懼視事五年凡殺萬餘人尚書令陽球常

拊髀發憤曰若陽球作司隸此曹子安得容乎既而球果遷司隸甫使門生於京兆界辜權官財物七千餘萬京兆尹楊彪發其姦言之司隸彪賜之子也時甫休沐里舍類以日食自劾球詣闕謝恩因奏甫類及中常侍淳于登袁赦封曷等罪辛巳悉收甫類等送洛陽獄及甫子永樂少府萌沛相吉球自臨考甫等五毒備極萌先嘗為司隸乃謂球曰父子既當伏誅亦以先後之義少以楚毒假借老父球曰爾罪惡無狀死不減責乃欲

論先後求假借邪萌乃罵曰爾前奉事吾父子如奴奴
敢反汝主乎今日臨阮相擠行自及也球使以土室萌
口簣扑交至父子悉死杖下頰亦自殺乃僵磔甫屍於
夏城門大署榜曰賊臣王甫盡沒入其財產妻子皆徙
比景球既誅甫欲以次表曹節等乃敕中都官從事曰
且先去權貴大猾乃議其餘耳公卿豪右若袁氏兒輩
從事自辦之何須校尉邪權門聞之莫不屏氣曹節等
皆不敢出沐會順帝虞貴人葬百官會喪還曹節見磔

甫尸道次慨然拭淚曰我曹可自相食何宜使犬舐其
汁乎語諸常侍今且俱入勿過里舍也節直入省白帝
曰陽球故酷暴吏前二府奏當免官以九江徵功復見
擢用愆過之人好為妄作不宜使在司隸以騁毒虐帝
乃徙球為衛尉時球出謁陵節敕尚書令召拜不得稽
留尺一球被召急因求見帝叩頭曰臣無清高之行橫
蒙膺大之任前雖誅王甫段熲蓋狐狸小醜未足宣示天
下願假臣一月必令豺狼鴟梟各服其辜叩頭流血殿上

呵叱曰衛尉扞詔邪至於再三乃受拜於是曹節朱瑀等
權執復盛節領尚書令郎中梁人審忠上書曰陛下即
位之初未能萬幾皇太后念在撫育權時攝政故中常
侍蘇康管霸應時誅珍太傅陳蕃大將軍竇武考其黨
與志清朝政華容侯朱瑀知事覺露禍及其身遂興造
逆謀作亂王室撞躅省闈執奪璽綬迫脅陛下聚會羣
臣離間骨肉母子之恩遂誅蕃武及尹勲等因共割裂
城社自相封賞父子兄弟被蒙尊榮素所親厚布在州

郡或登九列或據三司不惟祿重位尊之責而苟營私
門多蓄財貨繕修第舍連里竟巷盜取御水以作漁釣
車馬服玩擬於天家羣公卿士杜口吞聲莫敢有言州
牧郡守承順風旨辟召選舉釋賢取愚故蟲蝗為之生
夷寇為之起天意憤盈積十餘年故頻歲日食於上地
震於下所以譴戒人主欲令覺悟誅鉏無狀昔高宗以
雉雛之變故獲中興之功近者神祇啟悟陛下發赫斯
之怒故王甫父子應時馘截路人士女莫不稱善若除

父母之讎誠怪陛下復忍孽臣之類不悉殄滅昔秦信
趙高以危其國吳使刑人身毒其禍今以不忍之恩赦
夷族之罪姦謀一成悔亦何及臣為郎十五年皆耳目
聞見瑀之所為誠皇天所不復赦願陛下留漏刻之聽
裁省臣表埽滅醜類以答天怒與瑀考驗有不如言願
受湯鑊之誅妻子并徙以絕妄言之路章寢不報中常
侍呂彊清忠奉公帝以衆例封為都鄉侯彊固辭不受
因上疏陳事曰臣聞高祖重約非功臣不侯所以重天

爵明勸戒也中常侍曹節等宦官祐薄品卑人賤讒諂媚主佞邪徵寵有趙高之禍未被輶裂之誅陛下不悟妄授茅土開國承家小人是用又并及家人重金兼紫交結邪黨下比羣佞陰陽乖刺稼穡荒蕪人用不康因不由茲臣誠知封事已行言之無逮所以冒死干觸陳愚忠者實願陛下損改既謬從此一止臣又聞後宮采女數千餘人衣食之費日數百金比穀雖賤而戶有飢色案瀦當貴而今更賤者由賦歛繁數以解縣官寒不敢衣

饑不敢食民有斯厄而莫之卹宮女無用填積後庭天下雖復盡力耕桑猶不能供又前召議郎蔡邕對問於金商門邕不敢懷道迷國而切言極對毀刺貴臣譏呵宦官陛下不密其言至今宣露羣邪項領膏唇拭舌競欲咀嚼造作飛條陛下回受誹謗致邕刑罪室家徙放老幼流離豈不負忠臣哉今羣臣皆以邕為戒上畏不測之難下懼劍客之害臣知朝廷不復得聞忠言矣故太尉段熲武勇冠世習於邊事垂髮服戎功成皓首歷

事二主勲烈獨昭陛下既已式序位登台司而為司隸校尉陽球所見誣脅一身既斃妻子遠播天下惆悵功臣失望宜徵邕更加授任反類家屬則忠貞路開衆怨以弭矣帝知其忠而不能用上祿長和海上言禮從祖兄弟別居異財恩義已輕服屬疏末而今黨人銅及五族既乖典訓之文有謬經常之法帝覽之而悟於是黨錮自從祖以下皆得解釋初司徒劉邵兄侍中儵與竇武同謀俱死永樂少府陳球說邵曰公出自宗室

位登台鼎天下瞻望社稷鎮衛豈得雷同容容無違而
已今曹節等放縱為害而久在左右又公兄侍中受害
節等今可表徙衛尉陽球為司隸校尉以次收節等誅
之政出聖主天下太平可翹足而待也郤曰凶豎多耳
目恐事未會先受其禍尚書劉納曰為國棟梁傾危不
持焉用彼相邪郤許諾亦與陽球結謀球小妻程璜之
女由是節等頗得聞知乃重賂璜且脅之璜懼迫以球
謀告節節因共白帝曰郤與劉納陳球陽球交通書疏

謀議不軌帝大怒冬十月甲申劉邵陳球劉納陽球皆
下獄死

四年大長秋華容侯曹節卒中常侍趙忠領大長秋

六年春三月鉅鹿張角反以中常侍封諤徐奉等為內

應

事見黃巾之亂

中平元年張角之亂帝召羣臣會議北地太守皇甫嵩
以為宜解黨禁益出中藏錢西園廐馬以班軍士嵩規
之兄子也上問計於中常侍呂彊對曰黨錮久積人情

怨憤若不赦宥輕與張角合謀為變滋大悔之無救今
請先誅左右貪濁者大赦黨人料簡刺史二千石能否
則盜無不平矣帝懼而從之壬子赦天下黨人還諸徙
者唯張角不赦是時中常侍趙忠張讓夏惲郭勝段珪
宋典等皆封侯貴寵上常言張常侍是我公趙常侍是
我母由是宦官無所憚畏並起第宅擬則宮室上嘗欲登
永安候臺宦官恐望見其居處乃使中大人尚但諫曰
天子不當登高登高則百姓虛散上自是不敢復升臺榭及

封譖徐奉事發上詰責諸常侍曰汝曹常言黨人欲為不軌皆令禁錮或有伏誅者今黨人更為國用汝曹反與張角通為可斬未皆叩頭曰此王甫侯覽所為也於是諸常侍人人求退各自徵還宗親子弟在州郡者趙忠夏惲等遂共譖品彊云與黨人共議朝廷數讀霍光傳彊兄弟所在並皆貪穢帝使中黃門持兵召彊彊聞帝召怒曰吾死亂起矣丈夫欲盡忠國家豈能對獄吏乎遂自殺忠惲復譖曰彊見召未知所問而就外自屏

有姦明審遂收捕其宗親沒入財產侍中河內向栩上
便宜譏刺左右張讓誣栩與張角同心欲為內應收送
黃門北寺獄殺之郎中中山張鈞上書白竊惟張角所
以能興兵作亂萬民所以樂附之者其源皆由十常侍
多故父兄弟婚親賓客典據州郡辜權財利侵掠百
姓百姓之寃無所告訴故謀議不軌聚為盜賊宜斬十
常侍懸頭南郊以謝百姓遣使者布告天下可不須師
旅而大寇自消帝以鈞章示諸常侍皆免冠徒跣頓首

乞自致雒陽詔獄並出家財以助軍費有詔皆冠履視
事如故帝怒鈞曰此真狂子也十常侍固當有一人善
者不御史承旨遂誣奏鈞學黃巾道收掠死獄中朱
雋之擊黃巾也其護軍司馬北地傅燮上疏曰臣聞天
下之禍不由於外皆興於內是故虞舜先除四凶然後
用十六相明惡人不去則善人無由進也今張角起於
趙魏黃巾亂於六州此皆釁發蕭牆而禍延四海者也
臣受戒任奉辭伐罪始到潁川戰無不克黃巾雖盛不

足為廟堂憂也臣之所懼在於治水不自其源末流彌
增其廣耳陛下仁德寬容多所不忍故閹豎弄權忠臣
不進誠使張角臬夷黃巾變服臣之所憂甫益深耳何
者夫邪正之人不宜共國亦猶冰炭不可同器彼知正
人之功顯而危亡之兆見皆將巧辭飾說共長虛偽夫
孝子疑於屢至市虎成於三夫若不詳察真偽忠臣將
復有杜郵之戮矣陛下宜思虞舜四罪之舉速行讒佞
之誅則善人思進姦凶自息趙忠見其疏而惡之變擊

黃巾功多當封忠譖訴之帝識變言得不加罪竟亦不封
二年春二月己酉南宮雲臺災庚戌樂城門災中常侍
張讓趙忠說帝斂天下田畷十錢以修宮室鑄銅人樂
安太守陸康上疏諫曰昔魯宣稅畷而蜷災自生哀公
增賦而孔子非之豈有聚奪民物以營無用之銅人捐
捨聖戒自蹈亡王之灋哉內倖譖康援引亡國以譬聖
明大不敬檻車徵詣廷尉侍御史劉岱表陳解釋得免
歸田里康續之孫也又詔發州郡材木文石部送京師

黃門常侍輒令譴呵不中者因強折賤買僅得本賈十分之一因復貨之宦官復不為即受材木遂至腐積宮室連年不成刺史太守復增私調百姓呼嗟又令西園騶分道督趣恐動州郡多受賕賂刺史二千石及茂孝廉遷除皆責助軍修宮錢大郡至二三千萬餘各有差當之官者皆先至西園諧價然後得去其守清者乞不之官皆迫遣之時鉅鹿太守河內司馬直新除以有清名減責三百萬直被詔悵然曰為民父母而反割剥

百姓以稱時求吾不忍也辭疾不聽行至孟津上書極陳當世之失即吞藥自殺書奏帝為暫絕修宮錢六月以討張角功封中常侍張讓等十二人為列侯秋七月皇甫嵩之討張角也過鄴見中常侍趙忠舍宅踰制奏沒入之又中常侍張讓私求錢五十萬嵩不與二人由是奏嵩連戰無功所費者多徵嵩還收左車騎將軍印綬削戶六千冬十月諫議大夫劉陶上言天下前遇張角之亂後遭邊章之寇令西羌逆類已攻河東

恐遂轉盛豕突上京民有百先退死之心而無一前關
生之計西寇浸前車騎孤危假令失利其敗不救臣自
知言數見厭而言不自裁者以為國安則臣蒙其慶國危
則臣亦先亡也謹復陳當今要急八事大較言天下大
亂皆由宦官宦官共讒陶曰前張角事發詔書示以威恩自
此以來各各改悔今者四方安靜而陶疾害聖政專言
妖孽州郡不上陶何緣知疑陶與賊通情於是收陶下黃
門北寺獄掠按日急陶謂使者曰臣恨不與伊呂同

疇而以三仁為輩今上殺忠謇之臣下有憔悴之民亦在不久後悔何及遂閉氣而死前司徒陳耽為人忠正宦官怨之亦誣陷死獄中是歲帝造萬金堂於西園引司農金錢繒帛物積堂中復藏寄小黃門常侍家錢各數千萬又於河間買田宅起第觀

三年春二月以中常侍趙忠為車騎將軍帝使忠論討黃巾之功執金吾甄舉謂忠曰傳南容前在東軍有功不侯天下失望今將軍親當重任宜進賢理屈以副衆

心忠納其言遣弟城門校尉延致殷勤於傅燮延謂燮曰南容少答我常侍萬戶侯不足得也燮正色拒之曰有功不論命也傅燮豈求私賞哉忠愈懷恨然憚其名不敢害出為漢陽太守

五年夏五月故太傅陳蕃子逸與術士襄楷會於冀州刺史王芬坐楷曰天文不利宦者黃門常侍真族滅矣逸喜芬曰若然者芬願驅除因與豪傑轉相招合上書言黑山賊攻劫郡縣欲因以起兵會帝欲北巡河間舊

宅芬等謀以兵徵劫誅諸常侍黃門因廢帝立合肥侯以
其謀告議郎曹操操曰夫廢立之事天下之至不祥也
古人有權成敗計輕重而行之者伊霍是也伊霍皆懷
至忠之誠據宰輔之執因秉政之重同衆人之欲故能
計從事立今諸君徒見曩者之易未覩當今之難而造
作非常欲望必克不亦危乎芬又呼平原華歆陶丘洪
共定計洪欲行歆止之曰夫廢立大事伊霍之所難芬
性疎而不武此必無成洪乃止會北方夜半有赤氣東

西竟天大史上言北方有陰謀不宜北行帝乃止敕芬
罷兵俄而徵之芬懼解印綬亡走至平原自殺 八月
初置西園八校尉以小黃門蹇碩為上軍校尉虎賁中
郎將袁紹為中軍校尉屯騎校尉鮑鴻為下軍校尉議
郎曹操為典軍校尉趙融為助軍左校尉馮芳為助軍
右校尉諫議大夫夏牟為左校尉淳于瓊為右校尉皆
統於蹇碩帝自黃巾之起留心戎事碩壯健有武略帝
親任之雖大將軍亦領屬焉 冬十月望氣者以為京

師當有大兵兩宮流血帝欲厭之乃大發四方兵講武於平樂觀下起大壇上建十二重華蓋高十丈壇東北為小壇復建九重華蓋高九丈列步騎數萬人結營為陳甲子帝親出臨軍駐大華蓋下大將軍進駐小華蓋下帝躬擐甲介馬稱無上將軍行陳三匝而還以兵授進帝問討虜校尉蓋勳曰吾講武如何對曰臣聞先王曜德不觀兵今寇在遠而設近陳不足昭果毅祗躋武耳帝曰善恨見君晚羣臣初無是言也勳謂袁紹

曰上甚聰明但蔽於左右耳與紹謀共誅嬖倖蹇碩懼
出勲為京兆尹

六年夏四月蹇碩忌大將軍進與諸常侍共說帝遣進
西擊韓遂帝從之進陰知其謀奏遣袁紹收徐兗二州
兵須紹還而西以稽行期初帝數失皇子何皇后生
子辯養於道人史子眇家號曰史侯王美人生子協董
太后自養之號曰董侯羣臣請立太子帝以辯輕佻無
威儀欲立協猶豫未決會疾篤屬協於蹇碩丙辰帝崩

於嘉德殿碩時在內欲先誅何進而立協使人迎進欲
與計事進即駕往碩司馬潘隱與進早舊迎而目之進
驚馳從僂道歸營引兵入屯百郡邸因稱疾不入戊午
皇子辯即皇帝位年十四尊皇后曰皇太后太后臨朝
赦天下改元為光熹封皇弟協為渤海王協年九歲以
後將軍袁隗為太傅與大將軍何進參錄尚書事進既
秉朝政忿蹇碩圖已陰規誅之袁紹因進親客張津勸
進悉誅諸宦官進以袁氏累世貴寵而紹與從弟虎賁

中郎將術皆為豪傑所歸信而用之復博徵智謀之士
何顓荀攸及河南鄭泰等二十餘人以顓為北軍中候
攸為黃門侍郎泰為尚書與同腹心攸爽之從孫也蹇
碩疑不自安與中常侍趙忠宋典等書曰大將軍兄弟
秉國專朝今與天下黨人謀誅先帝左右掃滅我曹但
以碩典禁兵故且沈吟今宜共閉上閣急捕誅之中常
侍郭勝進同郡人也太后及進之貴幸勝有力焉故親
信何氏與趙忠等議不從碩計而以其書示進庚午進

使黃門令收碩誅之因悉領其屯兵票騎將軍董重與何進權勢相害中官挾重以為黨助董太后每欲參干政事何太后輒相禁塞董后忿恚詈曰汝今勅張怙汝兄耶吾敕票騎斷何進頭如反手耳何太后聞之以告進五月進與三公共奏孝仁皇后使故中常侍夏惲等交通州郡辜較財利悉入西省故事蕃后不得留京師請遷宮本國奏可辛巳進舉兵圍票騎府收董重免官自殺六月辛亥董后憂怖暴崩民間由是不附何氏

秋七月袁紹復說何進曰前竇武欲誅內寵而反為所
害者但坐言語漏泄五營兵士皆服畏中人而竇氏反
用之自取禍滅今將軍兄弟並領勁兵部曲將吏皆英
俊名士樂盡力命事在掌握此天贊之時也將軍宜一
為天下除患以垂名後世不可失也進乃白太后請盡
罷中常侍以下以三署郎補其處太后不聽曰中官統
領禁省自古及今漢家故事不可廢也且先帝新棄天
下我奈何楚楚與士人共對事乎進難違太后意且欲

誅其放縱者紹以為中官親近至尊出納號令今不悉廢後必為患而太后母舞陽君及何苗數受諸宦官賂遺知進欲誅之數白太后為其障蔽又言大將軍專殺左右擅權以弱社稷太后疑以為然進新貴素敬憚中官雖外慕大名而內不能斷故事久不決紹等又為畫策多召四方猛將及諸豪傑使並引兵向京城以脅太后進然之主簿廣陵陳琳諫曰諺稱掩目捕雀夫微物尚不可欺以得志況國之大事其可以詐立乎今將軍總

皇威握兵要龍驤虎步高下在心此猶鼓洪爐燎毛髮耳但當速發雷霆行權立斷則天人順之而反委釋利器更徵外助大兵聚會彊者為雄所謂倒持干戈授人以柄功必不成祇為亂階耳進不聽典軍校尉曹操聞而笑曰宦者之官古今宜有但世主不當假之權寵使至於此既治其罪當誅元惡一獄更足矣何至紛紛召外兵乎欲盡誅之事必宣露吾見其敗也初靈帝徵董卓為少府卓上書言所將湟中義從及秦胡兵皆詣臣

言牢直不畢稟賜斷絕妻子饑凍牽挽臣車使不得行
羌人慙腸狗態臣不能禁止輒將順安慰增異復上朝
廷不能制及帝寢疾重書拜卓并州牧令以兵屬皇甫
嵩卓復上書言臣誤蒙天恩掌戎十年士卒大小相狎
彌久戀臣畜養之恩為臣奮一旦之命乞將之北州效
力邊垂嵩從子酈說嵩曰天下兵柄在大人與董卓耳
今怨隙已結執不俱存卓被詔委兵而上書自請此逆
命也彼度京師政亂故敢躊躇不進此懷姦也二者刑所

不赦且其凶戾無親將士不附大人今為元帥杖國威
以討之上顯忠義下除凶害無不濟也嵩曰違命雖罪
專誅亦有責也不如顯奏其事使朝廷裁之乃上書以
聞帝以讓卓卓亦不奉詔駐兵河東以觀時變何進召
卓使將兵詣京師侍御史鄭泰諫曰董卓彊忍寡義志
欲無厭若借之朝政授以兵柄將恣凶欲必危朝廷明
公以親德之重據阿衡之權秉意獨斷誅除有罪誠不
宜假卓以為資援也且事留變生殷鑒不遠宜在速決

尚書盧植亦言不宜召卓進皆不從泰乃棄官去謂荀攸曰何公未易輔也進府掾王匡騎都尉鮑信皆泰山人進使還鄉里募兵并召東郡太守橋瑁屯成臯使武猛都尉丁原將數千人寇河內燒孟津火照城中皆以誅宦官為言董卓聞召即時就道并上書曰中常侍張讓等竊倖承寵濁亂海內臣聞揚湯止沸莫若去薪潰癰雖痛勝於內食昔趙鞅興晉陽之甲以逐君側之惡今臣輒鳴鐘鼓如雒陽請收讓等以清姦穢太后猶不

從何苗謂進曰始共從南陽來俱以貧賤依省內以致
富貴國家之事亦何容易覆水不收宜深思之且與省
內和也卓至浍池而進更狐疑使諫議大夫种邵宣詔
止之卓不受詔遂前至河南邵迎勞之因譬令還軍卓
疑有變使其軍士以兵脅邵邵怒稱詔叱之軍士皆披
遂前質責卓卓辭屈乃還軍夕陽亭邵嵩之孫也袁紹
懼進變計因脅之曰交構已成形勢已露將軍復欲何
待而不早決之乎事久變生復為竇氏矣進於是以紹

為司隸校尉假節專命擊斷從事中郎王允為河南尹
紹使雒陽方略武吏司察宦者而從董卓等使馳驛上
奏欲進兵平樂觀太后乃恐悉罷中常侍小黃門使還
里舍唯留進素所私人以守省中諸常侍小黃門皆詣
進謝罪唯所措置進謂曰天下匈匈正患諸君耳今董
卓垂至諸君何不早各就國索紹勸進便於此決之至
於再三進不許紹又為書告諸州郡詐宣進意使捕索
中官親屬進謀積日頗泄中官懼而思變張讓等婦太

后之妹也讓向子婦叩頭曰老臣得罪當與新婦俱歸
私門唯受恩累世今當遠離宮殿情懷戀戀願復一入
直得暫奉望太后陛下顏色然後退就溝壑死不恨矣
子婦言於舞陽君入白太后乃詔諸常侍皆復入直八
月戊辰進入長樂宮白太后請盡誅諸常侍中常侍張
讓段珪相謂曰大將軍稱疾不臨喪不送葬今歛入省
此意何為竇氏事竟復起邪使潛聽其聞其語乃率其
黨數十人持兵竊自側闥入伏省戶下進出因詐以太

后詔召進入坐省閤讓等詰進曰天下情憤亦非獨我曹罪也先帝嘗與太后不快幾至成敗我曹涕泣救解各出家財千萬為禮和悅上意但欲託卿門戶耳今乃欲滅我曹種族不亦太甚乎於是尚方監渠穆拔劍斬進於嘉德殿前讓珪等為詔以故太尉樊陵為司隸校尉少府許相為河南尹尚書得詔板疑之曰請大將軍出共議中黃門以進頭擲與尚書曰何進謀反已伏誅矣進部曲將吳匡張璋在外聞進被害欲引兵入宮宮

門閉虎賁中郎將袁術與匡共斫攻之中黃門持兵守
閣會日暮術因燒南宮青瑣門欲以脅出讓等讓等入
白太后言大將軍兵反燒宮攻尚書闥因將太后少帝
及陳留王劫省內官屬從複道走北宮尚書盧植執戈
於閣道窗下仰數段珪珪懼乃釋太后太后投閣得免
袁紹與叔父隗矯詔召樊陵許相斬之紹及何苗引兵
屯朱雀闕下捕得趙忠等斬之吳匡等素怨苗不與進同
心而又疑其與宦官通謀乃令軍中曰殺大將軍者即

車騎也吏士能為報讎乎皆流涕曰願致死匡遂引兵
與董卓弟奉車都尉旻攻殺苗棄其尸於苑中紹遂閉
北宮門勒兵捕諸宦者無少長皆殺之凡二千餘人或
有無須而誤死者紹因進兵排宮或上端門屋以攻省
內庾午張讓段珪等困迫遂將帝與陳留王數十人步
出穀門夜至小平津六璽不自隨公卿無得從者惟尚
書盧植河南中部掾閔貢夜至河上貢厲聲責讓等
且曰今不速死吾將殺汝因手劍斬數人讓等惶怖又

手再拜叩頭向帝辭曰臣等死陛下自愛遂投河而死
貢扶帝與陳留王夜步遂螢光南行欲還宮行數里得
民家露車共乘之至雒舍止辛未帝獨乘一馬陳留王與
貢共乘一馬從雒舍南行公卿稍有至者董卓至顯陽
苑遠見火起知有變引兵急進未明到城西聞帝在北
因與公卿往奉迎於北芒阪下帝見卓將兵卒至恐怖
涕泣羣公謂卓曰有詔却兵卓曰公諸人爲國大臣不
能匡正王室至使國家播蕩何却兵之有卓與帝語語

不可了乃更與陳留王語問禍亂由起王荅自初至終無所遺失卓大喜以王為賢且為董太后所養卓自以與太后同族遂有廢立之意是日帝還宮赦天下改光熹為昭寧失傳國璽餘璽皆得之以丁原為執金吾騎都尉鮑信自泰山募兵適至說袁紹曰董卓擁彊兵將有異志今不早圖必為所制及其新至疲勞襲之可禽也紹畏卓不敢發信乃引兵還泰山董卓之入也步騎不過三千自嫌兵少恐不為遠近所服率四五日輒夜潛出

軍近營明旦乃大陳旌鼓而還以為西兵復至雒中無
知者俄而進及弟苗部曲皆歸於卓卓又陰使丁原部
曲司馬五原呂布殺原而并其衆卓兵於是大盛乃諷
朝廷以久雨策免司空劉弘而代之初蔡邕徙朔方會赦
得還五原太守王智甫之弟也奏邕謗訕朝廷邕遂亡
命江海積十二年董卓聞其名而辟之稱疾不就卓怒
罵曰我能族人邕懼而應命到署祭酒甚見敬重舉高
第三日之間周歷三臺遷為侍中 董卓謂索綯曰天

下之主宜得賢明每念靈帝令人憤毒董侯似可今欲立之為能勝史侯否人有小智大癡亦知復何如為當且爾劉氏種不足復遺紹曰漢家君天下四百許年恩澤深渥兆民戴之今上富於春秋未有不善宣於天下公欲廢嫡立庶恐衆不從公議也卓按劍叱紹曰豎子敢然天下之事豈不在我我欲為之誰敢不從爾謂董卓刀為不利乎紹勃然曰天下健者豈惟董公引佩刀橫捐徑出卓以新至見紹大家故不敢害紹懸節於上

東門逃奔冀州九月癸酉卓大會百寮奮首而言曰皇
帝闇弱不可以奉宗廟為天下主今欲依伊尹霍光故
事更立陳留王何如公卿以下皆惶恐莫敢對卓又抗
言曰昔霍光定策延年按劍有敢沮大議皆以軍法從
事坐者震動尚書盧植獨曰昔太甲既立不明昌邑罪
過千餘故有廢立之事今上富於春秋行無失德非前
事之比也卓大怒罷坐將殺植蔡邕為之請議郎彭伯
亦諫卓曰盧尚書海內大儒人之望也今先害之天下

震怖卓乃止但免植官植遂逃隱於上谷卓以廢立議示太傅袁隗隗報如議甲戌卓復集羣僚於崇德前殿遂脅太后策廢小帝曰皇帝在喪無人子之心威儀不類人君今廢為弘農王立陳留王協為帝袁隗解帝璽綬以奉陳留王扶弘農王下殿北面稱臣太后顛涕羣臣含悲莫敢言者卓又議太后踰迫永樂宮至令憂死逆婦姑之禮乃遷太后於永安宮赦天下改昭寧為永漢丙子卓酖殺何太后公卿以下不布服會葬素衣而

已卓又發何苗棺出其尸支解節斷棄於道邊殺苗母
舞陽君棄尸於苑枳落中 詔除公卿以下子弟為郎
以補宦官之職侍於殿上 董卓自為太尉領前將軍
事加節傳斧鉞虎賁更封郿侯 董卓率諸公上書追
理陳蕃竇武及諸黨人悉復其爵位遣使弔祠擢用其
子孫 十一月以董卓為相國贊拜不名入朝不趨劍
履上殿 十二月戊戌以司徒黃琬為太尉司空楊彪
為司徒光祿勳荀爽為司空初尚書武威周毖城門校

尉汝南伍瓊說董卓矯桓靈之政擢用天下名士以收
衆望卓從之命瓊與尚書鄭泰長史何顒等沙汰穢
惡顯拔幽滯於是徵處士荀爽陳紀韓融申屠蟠復就
拜爽平原相行至宛陵遷光祿勳視事三日進拜司空
自被徵命及登台司凡九十三日又以紀為五官中郎
將融為太鴻臚紀寔之子融韶之子也爽等皆畏卓之
暴無敢不至獨申屠蟠得徵書人勸之行蟠笑而不答
卓終不能屈年七十餘以壽終卓又以尚書韓馥為冀

州牧侍中劉岱為兗州刺史陳留孔伷為豫州刺史東平張邈為陳留太守潁州張咨為南陽太守卓所親愛並不處顯職但將校而已 董卓性殘忍一旦專政據有國家甲兵珍寶威震天下所願無極語賓客曰我相貴無上也侍御史擾龍宗詣卓白事不解劍立搃殺之是時洛中貴戚室第相望金帛財產家家充積卓縱放兵士突其廬舍剽虜資物妻略婦女不避貴賤人情崩恐不保朝夕卓購求袁紹急周毖伍瓊說卓曰夫廢立

大事非常人所及袁紹不達大體恐懼出奔非有它志
今急購之勢必為變袁氏樹恩四世門生故吏徧於天
下若收豪傑以聚徒衆英雄因之而起則山東非公之
有也不如赦之拜一郡守紹喜於免罪必無患矣卓以
為然乃即拜紹勃海太守封邳鄉侯又以袁術為後將軍
曹操為驍騎校尉術畏卓出奔南陽是時豪傑多欲起
兵討卓者袁紹在勃海冀州牧韓馥遣數部從事守之
不得動揺東郡太守橋瑁詐作京師三公移書與州郡

陳卓罪惡云見逼迫無以自救企望義兵解國患難馥
得移請諸從事問曰今當助袁氏耶助董氏耶治中從事
劉子惠曰今興兵為國何謂袁董馥有慙色子惠復言
兵者凶事不可為首今宜往視他州有發動者然後和
之冀州於他州不為弱也他人功未有在冀州之右者
也馥然之馥乃作書與紹道卓之惡聽其舉兵

通鑑紀事本末卷八上